

29. april 2010

UPA 2010/96
UPA 2010/97

**Pujortarnermik inerteqquteqarneq pillugu Inatsisartut inatsisaat nr. xx, ulloq.
qaammat 2010-meersoq**

aamma

**Tupa avatangiisinillu tupatorfiunngitsunik isumannaarineq kiisalu tupanik
nioqqutissat nalunaaqutserneqartarneri pillugit Inatsisartut peqqussutaata
allanngortinneqarnera pillugu Inatsisartut peqqussutaat nr. xx, xx qaammat
2010-meersoq.**

pillugit

Inatsisartut Peqqissutsimut Ataatsimiititaliaata

ISUMALIUTISSIISSUTAA

Siunnersuutip aappassaaneerpeqarnerani saqqummiunneqartoq

Inatsisartut Peqqissutsimut Ataatsimiititaliaat suliarinninnermini kingullertigut
ukuninnga

Inatsisartunut ilaasortaq, Olga P. Berthelsen, Inuit Ataqatigiit
Inatsisartunut ilaasortaq, Debora Kleist, Inuit Ataqatigiit
Inatsisartunut ilaasortaq, Jakob Skade, Kattusseqatigiit Partiiat
Inatsisartunut ilaasortaq, Malik Berthelsen, Siumut
Inatsisartunut ilaasortaq, Akitsinnguaq Olsen, Siumut

Siullermeerinerup kingorna Inatsisartut Peqqissutsimut Ataatsimiititaliaata
siunnersuutit misissorpai.

Siunnersuutigineqartut siunertarisaat imarisaallu:

Innuttaasut peqqissusiannik siuarsaaneq inuillu allat tupatorlutik pujortarnerisa pujuannik najuussuinnikkut nammineq piumassuserinngisamik ajoquserneqarsinnaanerup pinaveersaartinneqarnissaa Inatsisartut inatsisissaattut siunnersuutaapput.

Inatsisartut peqqussutissaattut siunnersuutip aallaavigaa qulaani siunnersuutigineqartup Inatsisartut inatsisissaattut siunnersuutigineqartup kingunerisaanik aalajangersakkat arlallit peqqussummi pineqartumi nutaatut taarsiullugit Inatsisartut inatsisissaattut atutilissammata.

Pujortartarnermik inerteqquteqarneq pillugu, Inatsisartut inatsisissaattut siunnersuuteqarnerup akuersissutigineqarpata kingunerissavaa 1998-miit – 2004-mut pujortarnerup inerteqqutaanissaa pillugu maleruagassiat arlallit sukaterneqarnerat.

Inatsisartut ukiakkut 2007-mi aamma upernaakkut 2008-mi ataatsimiinneranni inini tamanit najorneqarsinaasunik tupatortarnerup killiliiffigineqarnissaanut siunnersuutit sisamat oqaluserimmatigit pujortartarnerup ajoqutaasumik sunniutaasa erseqqissumik nassuerutigineqarnerat oqallinnermilu amerlanerussuteqartuni ersersinneqarmat, inatsisartut aalajangiipput inini tamani najorneqarsinnaasuni pujortarneq inerteqqutaalissasoq.

Peqqissutsimut Naalakkersuisup saqqummiinnermini Inatsisartut inatsisissatut siunnersuummut nassuiaatigaa, innuttaasut peqqinnissaat pillugu naalagaaffiup ilisimatusarfia nunatsinni innuttaasunik misissuinnermik 2005-imiit 2007-mut ingerlatsitsisimasoq, misissuinnermi tassani erserpoq anersaartuutitigit puatsigullu tupamut attuumassuteqartunik krefteqarneq krefteqartuni nunatsinni atugaanerpaasoq pujortartarnerullu kingunerisaanik aamma allat pujortarnerisigut pujumik najuussuinnerup kingunerisaanik toqusartut tamarmiusut amerlassusiisa sisamararterutaasa missaaniittut.

Pujortarnermik inerteqquteqarneq pillugu Inatsisartut inatsisissaattut siunnersuuteqarnermik tupatortartut ullumikkut ikiliartornerisa qulaarnaarneqarnissaa, innuttaasut peqqissuunissaata siuarsarneqarnissaa, pujortartanngikkaluarlunilu putsumik najuussisarnermik akornutaalersartut pinaveersaartinneqarnissaat neriuutigineqarpoq.

Inatsisartut suliarinninnerat

Siullermeerinnermi Inatsisissatut siunnersuutit marluisut Inatsisartuni partiinit tamanit tapersorsorneqarlutik ataatsimiititaliamut ingerlateqqinneqarnissaat innersuussutigaat. Partiit makku ilaatigut kaammattuutigeqqullugit eqqumaffigeqqullugillu saqqummiussaanut ilaapput, sumiiffinni tamani silami arsakoofinnik inissiisoqarnissaa, maangaannaq eqqaasoqannginnissaa nunamillu eqqiluitsuutitsinissap isumannaarneqarnissaa anguneqassasoq.

Ataatsimiititaliap suliarinninnera

Ataatsimiititaliap tamarmiusup sumiiffinni tamani inuit orniguttarfii katerisimaartarfiinilu pujortartarnerup inatsisitigut inerteqqutaalernissaa tapersorsorpaa. Ataatsimiititaliami pingaartinneqarluni eqqartorneqartunut ilaavoq, piffissami sivisuumi pujortartarnerup Inatsisartuni eqqartorneqareerluni tassungalu atasunik inatsisitigut sukaterisoqareersimanerata kingunerisaanik maanna inuit ornittagaat suliffeqarfiillu 10-t pallillugit sulisoqartuni tamani pujortarfiujunnaarnissaat.

Inatsisip 1. januar 2010 aallarnerfigalugu atuutilertussaagalarpoq. Tamannalu 1. oktober 2010 kinguartinneqarpoq.

Ataatsimiititaliap tamarmiusoq isumaqarpoq inuit orniguttarfii suliffeqarfiillu inatsisissap atuutilernissaanut piareersarfissaat naammattoq, taamaalilluni inatsisissap eqqunneqarnissaa kinguardeqqissallugu pissutissaqanngitsoq.

Ataatsimiititaliap tamarmiusup isumaqatigiissutigalugu aalajangiuppaa, unioqqutitsinerit aalajangersakkat inatsisissami pineqartumi allaqqasut aallaavigalugit, sulisitsut sulisuminnut najoqqutassiornissaat iliuusissanillu aallussilluarnerisa kingunerisaanik inatsisip atuutsinneqarnissaata siunertaa malillugu kinguneqarluarumaartoq.

Ataatsimiititaliap erseqqissarumavaa pineqaatissiilluni pillaammik akiliisitsisoqarsinnaaneq unioqqutisisunut tamatigut pillaammik akiliuteqartitsinissaq inatsisissami siunertarineqanngimmat. Ataatsimiititaliap erseqqissarumavaa inatsisinik unioqqutisisoqartillugu pillaammik akiliisitsilluni pineqaatissiinerit inunnut ataasiakkaanut soorlu unnuisarfii pujortarfigeqqusannigitsuni ilaatigut atuutereermat.

Ataatsimiititaliataliap naatsorsuutigaa inatsisissap atuutilernerani atuisut allatuulli sungiussiniarnissaat tamannalu piffissaq sivisunngitsoq atorlugu piumaartoq.

Naggataatigut ataatsimiititaliap tamarmiusup kissaatigaa pujortartarnerup inerteqqutaalernissaanut inatsisissap inuit peqqinnerulernissaannut annertuumik aqutissiuusseqataalluni kinguneqarluarumaartoq.

Inassuteqaatit

UPA 2010 / 96: ” Pujortarnermik inerteqquteqarneq pillugu Inatsisartut inatsisaat nr. xx, ulloq. qaammat 2010-meersoq. “

aamma

UPA 2010 / 97: “ Tupa avatangiisinillu tupatorffiunngitsunik isumannaarineq kiisalu tupanik nioqqutissat nalunaaqutserneqartarneri pillugit Inatsisartut peqqussutaata allannngortinneqarnera pillugu Inatsisartut peqqussutaat nr. xx, xx qaammat 2010-meersoq. “

**Peqqissutsimut Ataatsimiititaliap tamanna tunngavigalugu inatsisissatut
siunnersuutit akuersissutigineqarnissaat inassutigaat.**

Taama oqaaseqarluni Peqqissutsimut Ataatsimiititaliap siunnersuutit Inatsisartunut aappassaaniigassanngortippaat.

Olga P. Berthelsen,
Siulittaasoq

Debora Kleist

Jakob Skade

Malik Berthelsen

Akitsinguaq Olsen